

續修四庫全書

《續修四庫全書》編纂委員會編

續修四庫全書

上海古籍出版社

一四一九・集部・別集類

南山集十四卷補遺三卷〔清〕戴名世撰……………一

通志堂集二十卷〔清〕納蘭性德撰……………三〇一

棟亭詩鈔八卷 棟亭詩別集四卷 棟亭詞鈔一卷 棟亭詞鈔別集一卷 棟亭文鈔一卷

〔清〕曹寅撰……………五二五

南山文集

十四齋

補遺
附後

光緒二十六

季夏月重鐫

南山集序

五嶽之氣皆能出雲雨產金玉而其靈者常鬱鬱盤魄而發爲偉人或以德業或以文章卓卓有重於天地而與爲不朽然其靈亦不能並時而鍾如寒暑之遞運而以時至往往積千百年一見蓋造物之力亦有所惜未能數數然也鄒魯之間闕里在焉此天地之神靈爲之發育非止由乎泰岱也而一時從游之士亦多東國之產則嶽神蓋已有所屬矣嵩高以生申甫誦於詩楊震郭子儀諸公多在華山下惟恆霍之靈自古至今未有所洩而

朱序

霍更甚霍山者今安慶天柱山古南嶽也安慶朱邑陳武何點三君子畧著史冊其以德業文章見者寥寥明興以來直亮之士稍稍出焉而以配靈霍山猶未之有也說者以爲隋唐而後南嶽之祀移於湘南霍山不列五嶽之數其靈或有所窮然予嘗游岱山之下西登華山矣其爲山也秩祀雖領於祠官而開鑿斲削多改其故童孺女婦踐而越焉日觀之宮且肖一婦人以爲神有司權金錢網其利而霍山獨皜然太清之表石巖泉瀑間上之爲黃帝虞舜之所祭告下亦不失爲漢武之所

封後世淫瀆之物不得而汚之則霍山之神必能
守古制以自樂而無羨於彼之燔牲瘞玉相詫以
三公之號獨榮於天下也余與戴君田有皆生霍
山之麓東西相距皆二百里而遙皆迂拙無用於
時而自力於古文以取正於天下而待於後世則
皆有其志顧余力薄才弱爲之而無成田有年未
壯時出語輒工至今垂二三十年稍稍收輯之得
若干篇命之曰南山集而命余爲序夫岱之靈發
於聖門嵩之靈發於申甫華之靈發於楊震郭子
儀之屬而霍山卒無所洩在人方以秩祀之不至

朱序

五

而疑霍山之窮在霍山正以不辱於世之三公而
有以自樂而予與田有乃適生其間余不足道也
田有亦不知果能當霍山之靈與否然而其文足
以不朽則余固知其與霍山同永無疑也五嶽與
霍或領於祠官或不領於祠官譬則一掛仕版而
受職於時一不臣不友而抱奇以志於古然則今
五嶽所鍾必多功名之士而沉冥著書者固於霍
山爲宜也歟今其集名曰南山者何也志歸隱之
地也田有自是殆不復出矣宿松朱書撰

壬午之冬吾友褐夫卜宅於桐城之南山而歸隱
焉從遊之士刻其所爲古文適成因名曰南山集
其文多未歸時所作而以茲所居名焉著其志也
余自有知識所見聞當世之士學成而並於古人
者無有也其才之可拔以進於古者僅得數人而
莫先於褐夫始相見京師語余曰吾非役役於是
而求有得於時也吾胸中有書數百卷其出也自
付將有異於人非屏居深山足衣食使身一無所
累而一其志於斯未能誘而出之也其後各奔走
四方歷歲踰時相見必以是爲憂余亦代爲憂而

方序

自辛未迄今十餘年而莫遂其所求吾聞古之著
書者必以窮愁然其所謂窮愁者或肥遯不出仕
宦而中跌名尊身泰一無所累其心故得從容著
書以自適也自科舉之法行年二十而不得與於
諸生之列則里正得而役之鄉里之吏鞭笞行焉
又非貴遊素封之家則所以養父母畜妻子者常
取足於傭書授經窘若拘囚終身而不息尙何暇
學古人之學而冀其成耶故士窮愁則必不能著
書其事若與古異而以理推之則固然而無足怪
也褐夫少以時文發名於遠近凡所作賈人隨購

而刊之故天下皆稱褐夫之時文而不知此非褐夫之文也其載筆墨以遊四方喜述舊聞記山水之勝而以傳序說請者亦時時應焉故世復稱其古文是集所載是也而亦非褐夫之文也褐夫之文蓋至今藏其胸中而未得一出焉夫立言者不朽之末也而其道尤難書傳所記立功名守節義與夫成忠孝而死者代數十百人而卓然自名家之言自周秦以來可指數也豈非其事獨希故造物者或靳其才或艱其遇而使皆不得以有成耶褐夫之年長矣其胸中之言繼自今而不出則

方序

時不贍矣必得身之無所累而爲之則果有其時耶故余序是集而爲褐夫憂者倍切焉因發其所以使覽者知褐夫之志而褐夫亦時自警而亟成其所志也同里方苞撰

吾師憂庵先生所爲制義百篇既已流傳於世人皆知誦法矣而其所爲古文較之制義更工且富於是四方學者購先生之古文踵相接也而先生堅匿不肯出雲鶚固請先生刊行於世先生曰古文之道較之制義難且數倍吾遭困阨奔走於衣食其於工力未能深入闢奧安能必其傳世而行遠且古人文字必屢加改易而後有定本今吾所爲文隨筆直寫未經鍛鍊篋中所存皆草稿而已吾方欲買山深隱細加擇別更定而後敢出以問世其或後來學業有進文或加工則向時所爲

沈序

且將舉而棄之而何刊行之爲蓋先生下筆妙天下而猶虛懷不自信如此雲鶚無以塞四方學者之意乃檢平日所藏鈔本百餘篇在先生集中僅五之一爲刊而布之餘俟後有定本再鋟諸板昔人稱文章之逸氣三代以後司馬子長得之後惟歐陽永叔得之余謂歷南宋至元明迄今日惟先生得之先生留心先朝文獻十餘年網羅散軼次第畧備將欲成一家之言與史記五代史相頡頏而先生平居文字其風神淡蕩直接龍門廬陵先生雖虛懷不自信而南豐辨香四方學者之所宗

仰其必在是集也夫辛巳日受業允雲鶚識

九序

戴先生傳

戴先生諱名世字田有一字褐夫世居桐城南山以孝弟力田聞先生少負奇氣不可一世文章學行爭與古人相後先尤以史才自負喜網羅明代逸事既窮而遊多憤時嫉俗之論以是積學之士皆慕其才與之交而馳聲利挾權勢者則畏其口而忌其能先生由是益困康熙己丑年五十七始成進士及第第二人授翰林院編修當是時詔修明史數十年矣以史館徵求遺書凡事涉革除之際民間多諱不錄屢裁稿而未告成先生心

傳

竊痛之嘗著子遺錄以見其概又有與余生書曰前日浮屠犁支自言永歷中宦者爲足下道滇黔間事予聞之執筆往問焉予至而犁支已去因教足下亟爲我書其語來去年冬乃得讀之稍稍識其大畧而吾鄉方學士有滇黔紀聞一編予六七年前嘗見之及是而予購得是書取犁支所言考之以證其同異蓋兩人之言各有詳有畧而亦不無大相懸殊者傳聞之間必有訛焉然而學士考据頗爲確覈而犁支又得於耳目之所親記讀者將何取信哉昔者宋之亡也區區海島一隅僅如

彈丸黑子不踰時而又已滅亡而史猶得以備書其事今以宏光之帝南京隆武之帝閩粵永歷之帝兩粵帝滇黔地方數千里首尾十七八年揆以春秋之義豈遽不如昭烈之在蜀帝昺之在崖州而其事漸以滅沒近日方寬文字之禁而天下所以避忌諱者萬端其或菰蘆山澤之間有僅僅誌其梗概所謂存什一於千百而其書未出又無好事者爲之接拾流傳不久而已蕩爲清風化爲冷灰至於老將退卒故家舊臣遺民父老相繼漸盡而文獻無徵凋殘零落使一時成敗得失與夫孤

傳

二

忠効死亂賊誤國流離播遷之情狀無以示於後世豈不可歎也哉終明之世三百年無史金匱石室之藏恐終淪散放失而世所流布諸書缺畧不詳毀譽失實則是有明全盛之書且不得見其成而又況於夜郎印笮昆明洱海奔走流亡區區之軼事乎足下知犁支所在能召之來予與面論不勝幸甚先生是書鉅載南山集世久亭而行之先生及第後二年左都御史趙申喬追論其事坐擬凌遲

聖祖皇帝特恩減等罪死而余生先瘞死獄中因

連獲譴者凡數十人所著南山集遂禁不出後百餘年邑後學戴鈞衡搜輯逸稿編爲十四卷先生死年六十一無子弟輔世歸葬之南山硯莊論曰伏讀

高宗皇帝御批通鑒輯覽以福唐桂三王終明代焉大哉

王言非以著萬世之公哉趙申喬疏摘南山集有狂悖語世傳卽指與余生書故備著於編以俟權史者考之嗚呼可悲也夫邑後學徐宗亮謹撰

傳

三

南山先生年譜

先生行畧世多不傳所僅見者文中自道里中吳氏棄手寫本及尤刻南山集偶鈔文目之下多繫以年爰推甲乙以證終始於其家乘亦兼採烏纂爲年譜以示來哲

順治十年癸巳

先生生於是年三月十八日吉時先生曾祖孟庵先生猶在堂年五十八祖古山先生年四十父霜崖先生年二十一 友人曰余少從戴皋亭師游皋亭南山先生元孫也家藏南山先生

年譜

年譜少時見之戴先生一歲能言今皋亭師之子孫無復存其書不復可得也

十一年甲午

先生二歲父霜崖先生以是年補縣學生按先生先君序畧云歲甲午年二十一補博士弟子

十二年乙未

十三年丙申

十四年丁酉

十五年戊戌

先生六歲是年初從塾師受學按先生時文全

集序云予自六歲從塾師受學凡五年而四書五經讀已畢

十六年己亥

十七年庚子

十八年辛丑

先生九歲弟平世以是年六月十九日生時霜崖先生授徒廬江按先君序畧云歲辛丑壬寅間始擔囊授徒廬江

康熙元年壬寅

二年癸卯

年譜

三年甲辰

四年乙巳

五年丙午

六年丁未

七年戊申

八年己酉

九年庚戌

先生十八歲曾祖孟庵先生以是年二月十二日卒年七十有五按先生響雪亭記曾大父爲之銘有日不陰常雨盛暑猶雪遂以名其亭而

命小子記之據此是文作於孟菴先生在時當在十八歲以前集中所載是篇爲最早

十年辛亥

十一年壬子

先生二十歲是年始授徒按先生時文全集自序云讀書稍有得已二十矣先君子東修之入不足以給饗殮余亦謀授徒以養親

十二年癸丑

十三年甲寅

十四年乙卯

年譜

三

十五年丙辰

先生二十四歲是年所作有正希稿序有大士稿序答朱生書左忠毅公傳

十六年丁巳

十七年戊午

先生二十六歲是年所作有老子論三首

十八年己未

先生二十七歲始受知於督學使者劉木齋先生按先生時文全集隱居以求其志二句題文後自記云此與子游子夏二段題文係己未年

督學使者劉木齋先生月課首取之作也三義極蒙先生咨賞明年遂入縣學距今踰二十年矣偶定舊稿頗欲棄去念當年文風卑弱特甚余以文不諧俗蒙詬厲而外間之知吾文自茲始後來督學知余者惟今大司農李公此外小試及場屋之文無一不落者存此志知己之感也是年所作有書詠蘭詩後與王靜齋先生書與趙良治書窮鬼傳又有先世遺事記贈趙良治序褐夫字說 集中載與王靜齋書二首論一首抄自吳氏寫本下注己未作其短篇抄自

年譜

四

尤氏刊本不知作於何時當亦己未作也十九年庚申

先生二十八歲補縣學生是秋謁劉木齋先生於句曲按先生送朱字綠序云庚申之秋余謁劉公於句曲父霜崖先生以是年冬十一月十九日卒於陳家洲館次年四十八詳集中先居序畧

二十年辛酉

先生二十九歲授徒陳家洲按先生初集原序云歲辛酉余教江濱洲渚之上菰蘆之中無可

以慶日又汪河發墓誌云余辭出山來江濱時時憂念蓋卽仍霜崖先生館地也是年編訂霜崖先生遺詩自訂古文初集周易文稿所作有先大人詩序初集原序自訂周易文稿序又有與弟書先君序畧汪河發墓誌銘春秋經解三首疑解祭錢雲瞻文鸚鵡贊

二十一年壬戌

先生三十歲授徒舒城郭氏按先生郭生詩序云今年春余踰岐嶺浴於湯泉有郭生者遺其二子受學於余是年所作有郭生詩序潘木崖

年譜

五

先生詩序青布潭記溫泉記河墅記紀老農夫說紀夢筆贊

二十二年癸亥

先生三十一歲仍客舒城得交許亦士按先生贈許亦士云乃者客於舒城尤荒陋而亦士獨爲有志於道者是年所作有左生生字說贈許亦士序

二十三年甲子

先生三十二歲仍客舒城秋應鄉試遇宿松朱書於舊縣遂訂交按先生送朱字綠序云歲在

甲子余浮江往金陵舟次舊縣登岸與舟子相與語有兩生攜手立江干聞余言前問日子得非桐城人乎余曰是也一生曰桐城有某秀才子豈嘗識之蓋余姓名也余曰足下何郡人乃識秀才生曰吾宿松人也素知秀才故問之余曰足下家宿松亦知有朱字綠者乎生曰我是也余曰某秀才卽我也因相視一笑至余舟跌坐谷道平生則皆大喜過望是年所作有上劉木齋先生書送釋鍾山序送朱字綠序曹先生傳又有西園記楊劉二王合傳薛大觀傳陳士

年譜

六

慶傳李逢亨傳楊維嶽傳

二十四年乙丑

先生三十三歲仍客舒城館於許氏按先生書許翁事云余客翁家兩載翁季子從余與王雲濤書云今歲授經於舒城舒之司訓何君與足下同縣因爲一通付之以達於左右周烈婦傳贊曰頃余客舒與許君遊也許君爲言烈婦事甚具先生以是歲得選貢生按邑誌順治初題准府州縣學將文行兼優者取送入監肄業名曰貢監順治八年康熙二十四年皆舉行雍正

十一年乃分貢監名色廩生准貢所謂優貢也先生是時以廩生選貢則食餼當在庚申壬戌癸亥三歲不可考矣時督學使者爲吉水李公振玉是年所作有書震川文集後與王雲濤書周烈婦傳徐節婦傳書許翁事書許榮事

二十五年丙寅

先生三十四歲是冬入京師按先生北行日記序云往余居鄉以教授餬口不過一百里二百里之內歲得一鍰兩鍰與村學究爲曹伍計四時中省親一再歸歸數日即去雖無安居之樂

年譜

七

亦無行役之苦後以死喪債負相迫適督學使者貢余於太學遂不得已而爲遠行則始於歲丙寅之冬是年所作有跋趙孟頫畫答張氏二生書按先生與劉言潔書云偶料檢篋中文字自丙辰至丙寅所著有蘆中集問天集困學集巖居川觀集爲刪其十之二三彙爲一集則先生是時著作已多矣

二十六年丁卯

先生三十五歲是年至京師以選貢生考取補正藍旗教習考授知縣應京兆試被放有與白

藍生書送蕭端木序蕭翁壽序艱貞叟傳書先給諫軼事

二十七年戊辰

先生三十六歲是年至京師客游山東按先生前謳集自序云戊辰己巳之間自燕臨濟游於渤海之濱遍歷齊魯之境同游者數人與余皆不得志又云數人者爲無錫劉齊武白寶宿松朱字綠溧陽史騏生常熟翁振翼華亭畢大生山陰胡賡昌按吳氏寫本載先生是年有代山東學政作條約數則茲紀同游凡八人時蓋同

年譜

八

齊山東學使之聘而學使不可稽爲何人矣

二十八年己巳

先生三十七歲仍客山東是夏自濟南入京師按先生李庶常家傳贊曰余以己巳之夏自濟南入京師又先生蔣度臣詞序云歲己巳秋余自河濟之間入燕按二文所紀夏秋不同者蓋啓行於夏稅駕於秋也是年所作有齊謳集自序與何杞瞻書張天問先生八十壽序

二十九年庚午

先生三十八歲居京師客吉水李少宰邸第先

生桃山鏡石記云歲庚午余客少宰李先生邸第先生嘗爲余言桃山之勝與鏡石之奇是年所作有四園集序畫石跋贈劉言潔序

三十年辛未

先生三十九歲居京師授經太常李愚庵先生家按李太常案牘序云今年客先生家得觀其案牘一書是年所作有黃崑圃稿序李潮進稿序四家詩義合刻序戴氏宗譜序狄向濤稿序

三十一年壬申

先生四十歲祖古山先生以是冬十月初一日

年譜

九

卒是年所作有西河婦荏山女合傳胡以溫家傳又有一壺先生傳李烈婦傳郭烈婦張天常先生八十壽序送王序綸之任婺源序

三十二年癸酉

先生四十一歲元配李孺人卒是年客福建按先生意園制義全集自序云歲癸酉秋余自福建還江甯又已卯作鄭允石制義序云往余自浙東踰仙霞建甯延平而至福州是時余友孫檢討子未爲福建考官今考吳氏寫本載先生是年有代作閩闈墨卷序是必代孫檢討作者

先生是年客福建無疑第考是年所作陳某詩序云今年春來京師謁選天官出其詩示余則先生春日猶在京師合證以意園制義全集序云云則秋未又還里客福建乃夏秋間耳

三十三年甲戌

先生四十二歲是年客淮上吳門間按先生書閩甯前墓誌後云癸酉之秋余客榕城明年夏余游淮上慶歷文牘本序云吾友汪君武曹既舉平日所藏隆慶萬曆兩朝文牘本雕刻之以行於世刻且成適余過吳門武曹悉舉以示余

年譜

十

且屬爲之序焉又甲戌房書序云余與武曹論定甲戌科新進士之文又有甲戌房書小題文序又庚辰小題文選序云歲甲戌丁丑吾友汪君武曹從事房書之選余實襄其役蓋武曹是時在吳門操選政先生亦客是與商榷也

三十四年乙亥

先生四十三歲是年復入京師有乙亥北行日記按乙亥北行日記云六月初九日自江甯渡江先是浦口劉大山過余邀與同入燕余以資用不給未能行至是徐位三與其弟文虎來送

少頃郭漢瞻吳佑咸兩人亦至至江甯聞登舟距家數十步耳據此是時先生已移居金陵矣乙亥北行日紀又云余之入京師至是凡四考先生初入京爲丙寅冬再入京爲己巳夏此爲四入京而三入京之年不可考余意壬申南還癸酉春復入京夏客福建秋季旋里甲戌客淮上吳門遂移居金陵至此復入京耳按先生蔡阜亭稿序云往余居金陵九載先生以壬午冬自金陵歸居南山逆推九載當爲甲戌則移居在甲戌明矣所作有方百川稿序書全上選

年譜

十一

事

三十五年丙子

先生四十四歲居京師是年所作有種樹說孫檢討課兒草序送韓某序李庶常傳謝烈婦傳曹氏怪石記又有吳文煒傳朱翁詩序

三十六年丁丑

先生四十五歲是春自京師反金陵按北行日紀序云乙亥之夏自金陵至燕山有北行日紀付宿松朱字綠丁丑之春自燕山反金陵有南還日紀付祁門汪獻其已而獻其卒於客舍其

稿無從尋覓是年所作有野香亭詩集序徐文虎稿序汪武曹稿序馬宛來稿序贈顧君原序張翁家傳又有袁烈婦傳吳江兩烈婦傳闕里紀言序丁丑房書序答趙少宰書

三十七年戊寅

先生四十六歲居金陵母方孺人以秋九月十二日卒是年所作有徐貽孫遺稿序吳七雲制義序宏光朝僞東宮僞后及黨禍紀略儀真四貞烈合傳詹烈婦傳小學論選序命說

年譜

十二

三十八年己卯

先生四十七歲居金陵是年所作有崇禎癸未榆林城守紀畧甲申保定守城紀畧宏光乙酉楊州城守紀畧操房書選政有己卯房書小題文序友人方望溪以足秋領解江南刊其制義先生爲作靈皋稿序又有程偕柳淮南游草序鄭允石制義序左尚子制義序史某制義序中西經星同異考序宋嵩南制義序朱烈女傳王氏墓表諸作

三十九年庚辰

先生四十八歲春操房書選政夏五月膺浙江

學使保德姜公之聘遂往焉詳庚辰浙行日記
姜公詩文教令多出其手冬十二月回金陵是
年所作有憂菴記遊吼山記北行日記序上韓
宗伯書庚辰小題文選序九科文總序庚辰浙
行日記杜溪文稿序與劉大山書 按姜公名
櫛字崑麓望溪集有吏部侍郎姜公墓表
四十年辛巳

先生四十九歲正月復往浙江有辛巳浙行日
紀集中浙中山水諸記悉以是年作是年門人
尤雲鶚爲刻先生古文凡百有十餘篇名曰南

年譜

十三

山集是時先生已買宅里中之南山將歸隱矣
曰南山著其志也友人方百川是冬卒是年所
作有遊爛柯山記古樟記遊天臺山記鴈蕩記
龍鼻泉記畫網巾先生傳再上韓宗伯書

四十一年壬午

先生五十歲是年所作有遊大龍湫記唐允隆
傳節孝唐孺人傳送趙驂期序三山存業序冬
自江甯歸居南山 按先生硯莊記云自歲丁
卯至壬午凡十五年存於友人趙良治所者
凡千金是時吾縣田值甚貴而良治爲余買南

山岡田五十畝並宅一區田在腴瘠之間歲收
稻若干屋多新築頗宏敞屋前後長松不可勝
計良治復代余名堂額曰硯莊而余以歲壬午
冬自江甯歸居於此 硯莊距余居八九里許
先生之墓在其左近予嘗過先生訪求硯莊故
址問之土人皆不知至一地曠然夷衍不岡環
後繡陌交前証以先生所作數峯亭記左右皆
合惟無宅可證而其後高地又爲懷甯楊氏墳
予徘徊久之有老者笑謂余曰此勝地也墳中
人乃尙書其前空地昔戴榜眼居住乃知卽硯

年譜

十四

莊所在蓋先生子孫售之楊氏爲葬地耳
四十二年癸未

先生五十一歲是年所作有道墟圖詩序姚符
御詩序芥舟翁壽

四十三年甲申

先生五十二歲是年客姑蘇按先生時文全集
刻本序文末行有康熙甲申秋日書於姑蘇寓
齋云云又吳他山詩序云他山吳氏年近八十
矣杖而訪我於姑蘇寓舍又戴母湯孺人壽序
云余所居去官山十餘里欲徒步往爲壽適有

四十四年乙酉

吳門之役乃書此使諸弟持往太孺人所據北先生客姑蘇明矣考先生窮河源記云康熙四十三年遣使尋河源得其處與元史合是年予入京師聞其事訪得其詳乃爲記之則是先生春夏秋客姑蘇冬蓋由姑蘇入京矣是年所作有吳他山詩序自訂時文全集序趙傳舟制義序讀易質疑序唐宋八大家文選序戴母湯太孺人壽序沈壽民傳綠蔭齋占桂記窮河源記

年譜

十五

四十五年丙戌

舉人里中同榜者四人何隆遇吳總吳紹芳齊芳起主試者爲錢塘汪公霖同里姚公士藹四書題首題吾嘗終日不食一章次題君子之道譬如行遠必自邇三句三題禹惡旨酒一節是年始採朱子語錄纂四書大全所作有成周卜詩序傳天集序和陶詩序張貢五文集序禹貢錐指序送王雲衢之任新津序朱孺人壽序金知州傳蓼莊圖記

先生五十四歲會試被黜遂自京師客吳門操

房書之選按先生丙戌南還日記云五月二十八日抵蘇州寓舍程爽林臨云序歲乙酉余在京師明年春夏之間余自京師南還客吳門時余方從事房書之役劉退庵先生稿序云歲丙戌冬余客吳門先生亦客吳門爲日甚久蓋是冬亦未嘗旋里也是年所作有倪生詩序劉退庵先生稿序洪崑霞制義序儲執禮制義序繆太翁遺稿序楊千木稿序辨苗紀畧序恭紀睿賜慈教稿序溫灤家傳張驗封家傳方舟傳成烈婦傳邵生家傳紀紅苗事丙戌南還日記

年譜

十六

四十六年丁亥

先生五十五歲是年春夏仍客吳門按先生慧慶寺玉蘭記云慧慶寺距閶門四百里而遙歲丁亥春二月余晝間無事獨行野外因叩門而入凌母嚴太安人壽序云歲丁亥四月吳門凌君某介余族壻姜君賦三而來謁秋辭吳門客江都偕柳亦適授徒於此齊天霞稿序云歲乙酉天霞舉於京師明年成進士又踰一年具同年生方君靈皋爲刊其稿於金陵而取蘇署所作若干篇附之時余客淮上天霞以書來曰願

有言也按梅文常稿序云歲丁亥秋吾來南陵客劉氏之墓園而文常亦適自郡至先生所著四書大全以是冬告成是年所作有章太占稿序蔡阜亭稿序程偕柳稿序梅文常稿序高工部兩世遺稿序戴母唐孺人壽序凌母嚴太安人壽序何翁家傳慧慶寺玉蘭記

四十七年戊子

先生五十六歲是年入京師按程偕柳稿序云歲戊子余將北適京師過淮上主爽林家因得盡見爽林全稿先生四書朱子大全成友人程

年譜

十七

鳳來以是春二月鐫板行世有四書朱子大全序 四書朱子大全一書予向未之見庚子春先生之族孫 以是示予刻本甚精好上下方有硃筆批識或塗乙或增補皆先生親手寫蓋刻既成後先生逐年加校有未安者仍復審訂將以重梓也先生獲罪此書遂不行於世乾隆時金壇王步青爲四書滙泰所採錄朱子書與先生畧同不知王氏曾見此書耶抑先後適相合焉又此本簡首朱筆識曰另換他人名亦可亦先生親手寫者悲夫

四十八年己丑

先生五十七歲是年會試中式第一名進士殿試授一甲第二名里中同榜者有方式濟總裁爲福建李公光地陝西趙公廷樞會試四書題首題知者樂水一章次題今夫天二段三題孔子之謂集大成三節

四十九年庚寅

先生五十八歲自後數年先生著作不傳

五十年辛卯

先生五十九歲是年獲罪按方望溪文集兩朝

年譜

十八

聖恩恭紀云始戴田有本案牽連人罪有未減而方族附從尤重獄辭具於辛卯之冬五上折本又按全紹衣鮎琦之亭集前侍郎桐城方公神道碑文云宗人方學標者故翰林失職游滇中陷賊而歸怨望語多不遜里人戴田有日記多採其言姓而不名事發吏遂以爲公也及訊得知爲孝標先生獲罪世傳以與余生書據此則另有日記矣 按望溪集教忠詞祭田序云康熙辛卯余以南山集序牽連赴詔獄則全言未足據也